

# Sparida

DA ROMAN CAVIEZEL

■ **Avant las elecziuns naziunalas è sparida en il Grischun ina dunna da 50 onns. Signailem: Pitschna, statura in zic grassotla, pel clera, egls brins e chavels curts medemamain brins (eventualmain colorads).** Malgrà sia cumparsa na spezialmain meridiunala ha ella in num da migrants dal sid, cumbinà cun in num german che signifitga tar nus sfruschun. Probabel resulta da là ses profund basegn da nettezza che fa ch'ella tschiffa attatgas allergicas en contact cun umans immigrads, fugitivs u requirents d'asil. La persu-

na en dumonda patischa plinavant dad acuta sinistro-gentilofobia, ina malsogna zunt contagiusa che vegn transportada da verms cun legras strivlas da color enturn il venter. La polizia fa damai attent da mantegnair la duida distanza. Plirs passants han sco i para vesì ella repetidamain en ina pitschna citad en vischinanza da Cuira cun in num rumantsch che fa endament las tomatas. Curiosamain betg sin il plaz da golf, cun tut ils auters esters singulars, mabain gist dasperas, sin l'areal da la fabrica da chemia. E pir anc en posa da scheffa resoluda, disada da cumandar e da na tolerar nagina

objecziun. A persunas ch'han vulì la calmar haja ella sbragì ch'ella saja impfal la patruna, chastellana da Razén e multimiliardara, e che sch'ìls Grischuns na fe-tschian betg per cumond prendia ella ses pataclàn e giaia cun rubas e strubas en China. Tenor ils medis n'è quai betg da prender serius, uschè pauc sco sias sinceraziuns d'esser candidata politica per il cussegl naziunal. Ses bab, in ritgùn da Turitg, haja pajà milliuns per ch'ina partida la prendia sin la glista. Senza dubi in gèst da tempra terapeutica. Per evitar problems ed irritaziuns èn ils electurs e las electuras grischuns supplitgads gentilmain

da na scriver ses num sin la glista da votar. La paupra dunna ha cumpletamain pers l'orientaziun e na conuscha gnanc pli ses vair domicil, ina giada saja ella da Meilen, in'otra da Lai. En sia confusiun discorra ella magari englais cun ferm accent da Turitg e pretenda schizunt da vulair represchentar il Grischun en il parlament a Berna. Sche vus entupais la persuna che correspunda al signailem qua sura la fermaì cun quità e la tramettaì enavos en ses chantun da domicil Turitg. Tgi di che la realitad surpassia la ficziun?

**L'autur è scolast da gimnasi pensiunà.**

